

Ama' yej kijkuiloj San Pablo iga tokniwan yej chantitokej altepe' Roma Romanos

Pablo kijkuilowiliá tokniwan yej kitokaj Cristo yej ichamej Roma

¹ Nej niPablo, nikchiwa ken netekimaka Jesucristo.* Dios nenotza' iwán netapejpen iga manimochiwa iyapóstol† iga manikpowa ye'noticiaj yej tasalvarowa.

² Dios ipan profetajmej‡ ikyay tamatiltij iga asis inín ye'noticiaj, ijkón ijkulijto' ipan itájtol Dios,

³ ompa pan ye'noticiaj tajtowa de toTeko Jesucristo yej Dios iPiltzín, yej naceroko pan ipilówampa ipilowan el rey David.

⁴ Iwán Dios kijtoj iga Jesucristo yéj iPiltzín iwán kimá' poder, ken iyEspíritoj Dios tanextilij iga ki-ojpa-ixitij kan miktoya.

⁵ Jesucristo netapejpen iga manimochiwa iyapóstol iga manía ipan nochi paismej iga makicredokan, iwán makichiwakan nochi ken Dios kineki.

⁶ Iwán amejemenwa' in sekin de inomej yej Dios kinotza' iga ximochiwakan itatki Jesucristo.

* **1:1 1:1** Xikita glosario "Cristo". † **1:1 1:1** Xikita glosario "Apóstol". ‡ **1:2 1:2** Xikita glosario "Profeta".

⁷ Nimitzijkuilowiliáj amonochin amejemen yej anchantitokej ipan weyi-altepe' Roma. Amejemen yej Dios mitzneki, iwán mitztapejpenkej iga ximochiwakan itatki. Dios yej toTaj wan toTeko Jesucristo mamitzmakakan yej yekti iwán makichwa iga xonokan tamelá.

Pablo paxalojneki Roma

⁸ Achto nikmaka gracias Dios ipan itoka' Jesucristo iga nochi amejemen, iga noyan mojtowa iga anmoconfiarojtokej ipan Cristo.

⁹ Dios kita iga ayí' nikajtewa iga niktajtaniliá iga mamitzpalewikan amejemen. Nikyolmaka iga nitekipanowa iga Dios iga nikpojt' ye'noticiaj de iPiltzin.

¹⁰ Nochipa niktajtaniliá Dios siga yéj kineki, wel mania manimitzpaxalowilitij.

¹¹ Iga pox nimitzitasnekij iga wel manimitzpalewikan pan Dios itajtól, iga máj ximoconfiarokan pan Dios;

¹² ken tikijtowaj, matimosepan-palewikan iga majya sej matimoconfiarokan ipan toTeko.

¹³ Nokniwan, xikmatikan iga mia' vej nikne' manimitzitatij, e' este inán awelsan nia. Niajneki pan amoaltepe' Roma iga manikpowa itajtól Dios iga makicredokan mia', kensan nikchij kajkan nikpowilij sekin yej ayéj judiyojmej.

¹⁴ Nikmachiliá ken nikdeberowa Dios, inón iga manikuiguili Dios itajtól nochi gente, yej griegojmej iwán yej ayéj, yej tejté iteki o ayá'.

¹⁵ Inán pox nikyolmakato' iga manikpowati ye'noticiaj iga nochi yej anchantitokej Roma.

Itajtól Dios tasalvarowa

16 Ayá' nipinawa iga nikpowa ye'noticiaj, iga inón tájtól ipoder Dios iga kisalvarowa nochi yej yéj kicredowa; achto judiyojmej iwán nō yej ayéj.

17 Ipan inín ye'noticiaj tenextiliá iga san ticredowaj iwán timoconfiarowaj ipan Cristo, teye'ita Dios. Kan ijkuilijto' ijkín kijtowa: “Yej kichíwa ken kineki Dios, Dios kiye'ita iwán yawi onoti nochipa wan yéj.”

Tonochimej ayompa tikchijtokej

18 Inón iga Dios kinextiá desde ipan cielo iga kikuesowilijto' inomej yej kichijtokej yej ayékti, iga ijkón kichíwaj, kitzakuiliáj iga sekin makixmatikan Dios.

19 Yejemej kimatij yej wel momati de Dios, iga Dios imatika kinextilíjkeja;

20 puej Dios awel tikitaj, e' wel tikixmatij pan yej kichij. Este kuá'san Dios kichij inín tájli, ompa monojma-ita' iga yéj nokta Dios iwán nochi wel kichíwa; inón iga yejemej awel motajtowiliskej.

21 Puej malej iga kimatiayaj iga ono' Dios, e' ayá' kiweyimatiltijkej ken Dios, niga kimakakej gracias. Majwa' kejlámikij yej ajayékti, iwán yolpoliwikej ken se yej ayá' ye'tajlamiki.

22 Kijtowaj iga nochi kimatij, e' xetoktikej.

23 Kikajtejkej yej mela'Dios, yej nochi wel kichíwa, wan ayi'pa miki, iga kiweyimatiltiáj idolojmej yej tamachíwal. Ono' ídolo yej tacháj ken taga', e' taga' míkisan, ono' ídolo yej tacháj ken toto', ono' ídolo yej tacháj ken yej moelwawatatzowaj iwán ono' ídolo yej tacháj ken yolkamej yej nawí iyikxi.

24 Inón iga Dios kisenkokajtej inomej iga makichiwakan yej pox ayekti, yej kejlamikij iga makichiwakan. Iwán yejemensan mosepanchwilijkej yej poxsan ajayekti yej este tipinawaj iga tikitaj.

25 Inomej ayá' kikuikej iyojwi Dios, majwa' mokajkayajkej ipan yej ayéj ye'ojti iga kiweyimatiltijkej yej Diospa kichij, en lugar iga makiweyimatiltikan Dios, yej nochi kichij, yej kajasi iga mamoweyimatilti nochipa. Ijkónyawa'.

26 Inón iga Dios kisenkokajtej inomej iga makichiwakan ken kineki iyalmajmej, iga siwatkej ayo' motekayaj iwán taga', iga motekáyaja iwán yej siwá' nō iga kichiwaj yej ayekti.

27 Iwán ijkonsan nō tajtaga' kikajtejkej iga motekaj iwán siwá', iga motekaj iwán itaga-ikniwán iga kichiwaj yej ayekti. Poxsan moelēwijkej se' iwán se', iwán Dios kicastigarōj inomej iga mosepanchiwiliáj yej ayekti.

28 Iwán yejemen ay'ya kinekikej nité wān Dios. Dios kisenkokajtej inomej iga makichiwakan kensan kineki iyalmajmej iga makichiwakan yej ayekti.

29 Nochipa kichiwaj nochi yej ayekti, masij wān yej ayá' iwán namiktitokej, motekaj iwán itaga-iknin, kipoxnekij tomīn, namōlnemij, ta-ixitaj, tamiktiáj, mokuesowaj, takajkawāwaj iwán kejlamikij iga kichiwaj yej ayekti.

30 Tapopowaj, tapantiáj, kijiyaj Dios, taajawaj, moweyimatij, mokichmatij, pox welitij iga kichiwaj yej ayekti, akichiwaj ken kitekimakaj itajmej.

31 Xetoktikej, kijtowaj tejté iwán akichiwaj, ayéj te-ijiknimej, poxsamej iwán ayá' ta-ikneliáj.

32 Yejemej kimatij yej Dios tatekimaka iga mamochiwa, kimatij iga yej kichiwaj yej ayekti, kajasi iga mamikikan, e' malej ijkón, majsan kichiwaj, wan este kiyé'itaj kuá' kitaj agaj kichiwa yej ayekti.

2

Dios tajuzgarowa ken kajasi

1 Kuá' tikijliá se' iga kichij yej ayekti, mogánajsan timotikomota iga tej nō tikchijto' ijkón ken se' nemi tikjuzgarowa. Inón iga ay'ya wel timotajtowilij, a'san nesi in tej.

2 E' tikmatij iga Dios kichiwa ken kajasi kuá' kijuzgarowa inomej yej ijkón kichiwaj.

3 Tej yej tikijliá sekin iga kichiwaj yej ayekti iwán tej nō tikchiwa ijkón, tej an tikijtowa anka wel timiyanas iyixtaj Dios kuá' tajuzgaroj

4 ¿Anka tikijiya yej Dios mitzmaka iga Dios pox tachokiliá wan ayá' nimanín kuesiwi? ¿Ix atikmati iga pox ta-icneliá iga mitznextiliá iga xikajtewa iga tikchiwa yej ayekti?

5 E' tej timoyoltakuawiliá, iwán ayá' tikneki tikajtewa iga tikchiwa yej ayekti. Inón iga nemi tikuesowa Dios iwán mogánajsan nemi timochiwiliá iga mamitzjuzgarokan kuá' keman Dios wí' iga tacastigaroki ken kajasi.

6 Iwán yawi kixtawati sejsé kensan kichij.

7 Ono' yej nochipa kitemowaj iga kichiwaj yej yekti iga Dios makiyé'ita. Dios yawi kitajiti

inomej iga iyixtaj maye'onokan nochipa iwán nochipa onoskej wan yéj.

⁸ E' Dios kuesiwi iwán yawi kicastigaroti yej ayompa kichijtokej iwán iga ayá' kinekij m-kichiwakan ken Dios kineki, majwa' kichiwaj yej ayekti.

⁹ Yawij kinkochiwatij iwán yawij moyolmiktitij nochi yej kichiwaj yej ayekti; achto judiyojmej iwán nō yej ayéj.

¹⁰ Dios yawi kitāliti iga iyixtaj maye'onokan, iwán mapaktokan wan maonokan tamelá nochi yej kichiwaj yej yekti; achto judiyojmej iwán nō yej ayéj.

¹¹ Iga Dios ayá' sesan kiye'ita.

¹² Inochi yej kichiwaj yej ayekti, yej ayá' kixmatikej iley Moisés ijkón mikiskej; iwán yej kixmatikej iley Moisés iwán kichiwaskkej yej ayekti; iga inón ley yawij kijuzgarotij.

¹³ Iga Dios awel kiye'itas inomej yej iga san kikakij iley Moisés, yéj kiye'ita yej kichiwaj ken kijtowa inón ley.

¹⁴ Kuá' inomej gente yej ayéj judiyojmej, kichiwaj ken kijtowa la ley, malej iga ayá' kixmatij inón ley. Yejemensan iseltimej kichiwaj ken la ley tatekimaka;

¹⁵ Iga ken nemij kinextiáj iga ijkuilijto' se ley ipan iyalmajmej, iwán momachiliáj siga kichijkej yej yekti o ayekti.

¹⁶ Inín mochivas inón día kuá' Dios kimakas iga Jesucristo makijuzgaro inewi yej kichtakachijkej nochi tokniwan, kensan kijtowa ye'noticiaj yej nej nikpowa.

Judiyojmej iwán iley Moisés

¹⁷ Tej yej timokichmati iga tijudiyoj, iwán tikchíwa ken kijtowa iley Moisés, iwán timoweyimati iga tiye'ono' iwán Dios.

¹⁸ Tej yej tikijtowa iga tikmati katiá yej Diospa kineki iga mamochíwa, iwán la ley mitznextiliá iga wel tikye'tapejpena katiapa yej yekti.

¹⁹ Timomachiliá iga wel tikye'ojkuiltiá yej ayá' ye'nemij iwán ken tiktawía yej onokej ken kan takomichkan.

²⁰ Tikijtowa iga wel tikmachiá yej ayá' kixmatij itájtɔl Dios, iwán yej némi-o' pewa kixmati iyojwi Dios, iga san tikpiá la ley iwán timomachiliá iga tej yej wel titamachiá nokta.

²¹ Tej yej tikmachiá se', ¿ix ayá' achto tej ximomachi? Tej titamachiá iga amo matachtekilo, ¿in tej, te iga titachteki?

²² Tej tikijtowa iga ayekti iga yej namiktito' mayawí wan se', ¿in tej, te iga ijkón tikchíwa? Siga tej tikijiya idolojmej, ¿te iga titachteki ipan itiopamej idolojmej?

²³ Timoweyimati iga tikpiá la ley, e' tikajawilmati Dios iga ayá' tikchíwa ken tatekimaka la ley.

²⁴ Yej ígawa' ijkín kijtowa kan ijkuilijto': "Amotechko amejemen iga yej ayéj judiyojmej kipopowaj Dios."

²⁵ Melá'wa' siga timocircuncidarowa,* mitz-palewiá achi, e' siga tikchíjto'san ken tatekimaka iley Moisés; e' siga ayá' tikchíwa nochi, ken tikita ayá' timocircuncidaroj.

* **2:25 2:25** Xikita glosario "Circuncisión".

²⁶ Iwán siga yej ayá' ono' circuncidado makichíwa ken tatekimaka la ley, inón mo-itas ken tikita yej mocircuncidaroj, malej iga ayá' ono' circuncidado.

²⁷ Iwán yej ayá' ono' circuncidado, iga ayá' tekto' ikajlo', iwán makichíwa ken tatekimaka la ley, yéj yawi mitzjuzgaroti iga ayá' tikchíwa ken kijtowaj la ley, malej iga tikpiá la ley iwán tono' circuncidado.

²⁸ Se ayéj judío iga san ijkón nesi, malej se mamocircuncidaro, iga mamoteki ipan ikajlo'.

²⁹ Majwa' yej mela'judiyoj kicredowa Dios este ipan iyalmaj, wan yej ono' circuncidado ayejsan ipan ikajlo' sino que no este ipan iyalmaj, iwán inón awel kichíwa la ley, sino que iyEspíritoj Dios. Yej ijkón ono', Dios kiyé'ita malej iga tajtaga' ayá' kiyé'itaj.

3

¹ ¿Te motaniliá siga se majudiyoj?, ¿o te motaniliá siga se maono circuncidado?*

² Poxsan, iwán ono' mia' yej wel nimitznextiliá iga ijkón nokta; achto nimitzijliáj iga Dios kiyé'ita' judiyojmej iwán kimá' iley.

³ ¿Te kichij siga sekin de yejemej kikajtewaj iga moconfiarowaj ipan Dios? ¿Ix iga inonsan Dios kikajtewas iga kichíwas yej kijtoj?

⁴ ¡Ayéj ijkón! Majwa' Dios kichíwa nochi kensan kijtoj, malej iga nochi tajtaga' matakajkawakan; iga kan ijkuilijto' itájtol Dios kijtowa:

Pan motájtol nesis iga ompay ken tikijtowa,

* **3:1 3:1** Xikita glosario "Circuncisión".

iwán tiktānilij yej mitztelwiskej.

⁵ Kuá' tikchīwaj yej ayēkti, tiknēxtiáj iga Dios kajasi makuesiwi iwán matecastigarō. ¿Ix wel iga inón tikijtowaj iga Dios kichīwa yej ayēkti kuá' teçastigarōwa? (Nemi nitajtowa ken se taga' tajlamiki.)

⁶ ¡Ayéj ijkón! Siga Dios katka kichīwaya yej ayēkti, ¿kén wel kijuzgarōj nochi yej onokej ipan inín tajli?

⁷ Ono' sekin nō yej ayá' ye'tajlamikij yej kijtowaj: "Kuá' nej nitakajkayāwa, máj neši iga kajasi iga Dios mamoweyimatilti iga yéj ayí' takajkayāwa. Wel an nikijtowa, ¿te iga Dios mane-ítao' ken se yej ayēkti kichīwa?"

⁸ Siga ijkón, ¿te iga ayá' tikijtoskej iga matikchīwakān yej ayēkti iga mawīki yej yēkti? Ken nejemej sekin nepantiáj iga ijkón nitamachtíáj. Inomej yej ijkón nepantiáj, kajasi iga Dios makicastigarō.

Ateyi nisé yej maye'nemi

⁹ ¿Kéntaj? ¿Ix tejemen judiyojmej yej máj tiye'nemij que yejemej? ¡Ayéj ijkón! Nimitznēxtilíjkeja iga kensan judiyojmej kensan yej ayéj, nō kichijtokej yej ayēkti.

¹⁰ Kan ikuilijto' itájtōl Dios kijtowa:

Ateyi nisé yej ye'nemi, nisé nokta;

¹¹ Ateyi ni agaj yej kimatisneki yej yēkti, niga yej kitēmowa Dios iga makitoka iyojwi.

¹² Inewi kiskej ipan ye'ojti, iwán inochi momela'pojpolojkej.

Ateyi yej kichīwa yej yēkti, ateyi nisé nokta.

13 Itoskamej ken tikita animajxapo' yej tentapojto';

iga ompa kisaj ken iga takajkayawaj.

Itajtölmej yej kisaj ipan itemej kualo ken tikita kowa' iyayo.

14 San kijtojtokej yej ajayekti iwán san tayölmiktijtokej.

15 Nimaninsan kuesiwij este wel tamiktiáj;

16 san kan iga yawij, tapolowaj iwán tayölmiktiáj,

17 iwán ayá' kixmatij ojti yej tenextiliá iga matonokan tamelá.

18 Ni alín ayá' kimajmawiliáj Dios.

19 Nochi inín ijkuilijto' ipan itájtöl Dios. Tikmatij iga yej kipiáj iley Dios makichiwakan ken kijtowa. E', como ayá' kichiwaj, ayagaj wel kijtowa iga ye'nemi, iga ipan inín ley nesi iga tonochin ayompa tinemij wan kajasi iga Dios matecastigaro.

20 Ayagaj wel ye'ono iyixtaj Dios iga san kichywa ken kijtowa la ley, iga la ley tenextiliajsan iga tonochin tikchijawaj yej ayekti.

Se wel momanawia iga san moconfiarowa ipan Jesucristo

21 E' inán Dios tenextiliá ken iga wel tiye'onoj iyixtaj yéj, ayéj iga tikchijawaj ken kijtowa la ley; inín wel timomachtiaj kan ijkuilijto' pan la ley iwán kan kijkuilojkej profetajmej.

22 Yej moconfiarowa ipan Jesucristo, Dios nochi kiye'ita, a'san nesi yej kicredowaj ipan yéj.

23 Tonochin tikchijkej yej ayekti iwán inón iga timoyokatijtokej wan Dios.

24 E' Dios kiyokachij iga matiye'onokan iyixtaj iga san techokiliá. Te-iknelij iwán temañawij iga Jesucristo migui' iga tejemej.

25 Dios kititan iPiltzin iga mikiko; kitoyaj iyeyo iga totechko iga wel mateperdonarowili yej tikchijkej yej ayekti. Inón teperdonarowiliá iga san ticredowaj ipan Cristo. Ijkón Dios kichij yej yekti iga kiperdonarow yej ikay la gente kichijkej yej ayekti.

26 Inán iga Cristo migui' tenextiliá iga nochi yej ayekti kichijkej la gente, kiperdonarowilíjkeja. Iwán momela'mati iga ijkonya nokta ken Dios tajuzgarowa, iga ayo' kejlanto' yej ayekti yej kichijkej yej inán moconfiarowaj ipan Jesucristo.

27 ¿Kántaj kawí iga pox timokichmatij iyixtaj Dios? Támi'ya. ¿Te iga an? Ayéj iga tikchijkej ken kijtowa la ley, majwa' iga ticredójkejsan.

28 Ijkón tikawij; se wel ye'ono iyixtaj Dios iga kicredowa Jesucristo, ayéj iga kichíwa ken kijtowa la ley.

29 ¿In Dios, ix iDiossan judiyojmej? ¿Ix ayéj iDios nō yej ayéj judiyojmej? Kena, yejemen nō.

30 Iga Dios sesan ono' iwán kichíwas iga nochi maye'onokan iyixtaj yéj iga san moconfiarowaj ipan, até kichij siga judiyojmej o ayéj.

31 Iga timoconfiarowaj ipan Cristo, ¿ix ay'ya te iteki la ley? ¡Ayéj ijkón! Majwa' tiknextiáj te nokta iteki la ley.

4

Matimixkuítikan pan yej kichij Abraham

1 ¿Inán tē tikijtoskej, tē motānilij to-ikyapatajwewej Abraham?

2 Siga Dios kiyē'ita' Abraham iga san yej kichij, kajasi iga mamoweyimati, e' Abraham ayí' moweyimati' iyixtaj Dios.

3 Puej ¿tē kijtowa kǎn ijkuilijto' itájtōl Dios? “Dios kiyē'ita' Abraham ken sē yej akichij yej ayēkti iga moconfiāroj ipan Dios.”

4 E' siga sē tekipanowa, itomīn ayá' san kipet-zmakaj, majwa' kajasi iga makimakakǎn iga tatānija.

5 E' siga agaj yej niga tē kichīwa iga mayē'nemi iwán kicredowa ipan Dios iga yéj wel kiyē'itas, Dios kiyē'ita iga san kicredowa ipan yéj.

6 Ijkōsan nō kijtowa David iga mapāki yej Dios kiyē'ita, malej iga ayá' kichij nité iga makiyē'ita.

7 David kijtoj:

Yolpaktókeja yej Dios kiperdonarowílija yej kichijkej yej ayēkti iwán kēlkawílija yej ayompa kichijkej.

8 Yolpaktō' taga' yej toTēko ay'ya kejlāmikiliá inōn yej ayēkti kichij.

9 ¿Ix yolpaktōkej inómejsan yej onokej circuncidado, o nō yolpaktōkej yej ayá' onokej circuncidado? Tikitákeja iga Dios kiyē'ita' Abraham ken sē yej akichij yej ayēkti iga moconfiārojsan ipan Dios.

10 E' ¿kēman ijkón kita'? ¿Ix kuā' Abraham onoyay circuncidado, o kuā' aya? Áchtosan, kuā' aya mocircuncidarowa.

¹¹ Iwán Abraham mocircuncidaroj iga manesi iga Dios ki-omemáwija ken se yej ye'nemi, iga san moconfiaroj ipan Dios. Ijkón iga Abraham mochij ken tetajwéj de inochi yej moconfiarowaj ipan Dios, malej iga ayá' onokej circuncidado; ijkón Dios kita nochi inomej ken kuá' ayá' kichijkej yej ayękti.

¹² Abraham nō tetajwewej de inomej yej onokej circuncidado, e' yej nō moconfiarowaj kensan totajwewej Abraham moconfiaroj kuá' aya onoya circuncidado.

Dios kichīwa yej kijtoj iga se moconfiarówasan ípan

¹³ Pues Dios kijlij Abraham iwán ipilówampa ipilowan iga yejemen yawij kimakatij nochi tajli iga mamochīwa itatkimej. E' inín mochij ayéj iga Abraham kichijtoya ken kijtowa la ley, sino que iga moconfiaroj ipan Dios, iwán Dios kita' Abraham kenkuá' ayá' kichij nité yej ayękti.

¹⁴ Siga katka yejsan kichīwaj ken kijtowa la ley kimakaskej yej Dios kijtoj, báldejsan iga timoconfiarowaj ipan Dios. Iwán ay'ya valeroj yej Dios kijtoj iga temakas.

¹⁵ Iga atikchīwaj ken kijtowa la ley, kajasi iga matecastigarokan; e' kan ateyi la ley, ayagaj itechko iga akichīwa ken tatekimaka la ley.

¹⁶ Inón iga yej Dios kijlij Abraham iga kimakaskej nochi ipilowan ipilówampa, san kipet-zmakaskej iga Abraham moconfiaroj ipan yéj. Ijkón nochi ipilowan ipilówampa Abraham kimatij iga kimakaskej yej Dios kijtoj; ayéj iga yejsan kichīwaj ken kijtowa la ley, sino que nō

iga nochi yej kicredowaj ken kicredoj Abraham. Yéj mochiy tətaj iga nochi tejemej.

17 Itájtɔl Dios tajtowa de Abraham: “Tej nim-itztalij iga itətajwewej mia' naciomej.” Inín itájtɔl, Dios kimá' Abraham iga Abraham kicredoj ipan Dios yej wel ki-ojpa-ixitiá yej mik-tokej, iwán iga itájtɔl kichíwa yej aya teyi.

18 Malej iga nesía iga isiwa' akitaya ipiltzin, Abraham kicredoj iga mochiwas nochi yej Dios kijlij. Ijkón iga mochiy “tətaj iga mia' paismej”, ijkón ken Dios kijlij: “Poxsan piwis ipilowan mopilowan.”

19 Abraham ayá' kikajtey iga moconfiaroj ipan Dios, malej iga kipiayay ken cien años, iwán yéj kimatiá iga yéj iwán Sara ayo' wejka iga mikiaja wan poxsan yolejkej iga makipiakan ipilowan.

20 Yéj ayá' kijtoj iga akicredowa yej Dios kijlij, majwa' moconfiaroj poxsan ipan itájtɔl Dios iwán kiweyimatiltij,

21 kimela'mati iga Dios wel kichíwa inewi yej kijlij.

22 Inón iga Dios kita' Abraham ken se yej ye'nemi iyıxtaj iga moconfiaroj ipan yéj.

23 Iwán ayejsan iga Abraham inín mo-ijkuloj iga Dios kita' ken se yej ye'nemi iyıxtaj;

24 sino iga tejemen nɔ. Puej Dios nɔ te-ita ken yej tiye'nemij iyıxtaj iga timoconfiarowaj ipan yéj, yej ki-ojpa-ixitij Jesús toTeko.

25 Dios kine' iga makimiktikan Jesús iga yej tikchijkej yej ayekti, iwán ki-ojpa-ixitij iga matiye'onokan iyıxtaj yéj.

5

Wel tiye'onokej iyixtaj Dios

¹ Inán welja teye'ita Dios iga timoconfiarowaj ipan yéj, tonókeja tamelá wán yéj iga yej kichij toTéko Jesucristo iga tejemen.

² Inán iga timoconfiarojkej ipan Cristo, tikmatij iga Dios te-ikneliá iga welya tiye'onoj iyixtaj. Iwán tipakij iga tikmatij iga wí' día kuá' tikitaskiej yej yekti yej Dios temakas.

³ Iwán ayejsan iga inón tipaktokej, sino que no tipakij kuá' te-iknochiwaj, iga tikmatij iga kuá' te-iknochiwaj ompa timomachtiáj ken iga wel matikijyowikan kuá' te-iknochiwaj.

⁴ Iwán iga tikijyowiáj kuá' te-iknochiwaj, Dios teye'ita, iwán siga teye'ita Dios, wel tikmatij iga keman tonoskej iwán.

⁵ Iwán iga tikmatij iga keman tonoskej iwán, ayá' tipinawaj iga tikmatij iga témá' iyEspíritoj yej tenextiliá ken iga yéj tepoxchokiliá.

⁶ Kuá' awel timomanawiyaj toganaj, íkuá'wa' in Cristo migui' iga tejemen yej tikchiwaj yej ayekti.

⁷ Ayí' agaj kiyolmaka iga mamiki iga se', niga wel miki iga se yej ye'nemi; anka wel ono se yej wel mamiki iga se yej mela'ye'nemi nokta.

⁸ E', Dios tenextiliá iga tepoxchokiliá iga Cristo migui' iga tejemen, malej iga tikchijtokej yej ayekti.

⁹ Inán Dios teye'ita iga Cristo kitoyaj iyesyoy kuá' migui' iga tejemen; majya sej Cristo wel temanawij kuá' Dios kuesiwis wán kicastigaroj yej ayempa nemij.

¹⁰ Siga kuꜛ' tejemej aya teꜛe'itaya Dios, Cristo kichij iga teꜛe'ítaya iga mi' iga tejemej, kuantí máj iga inán teꜛe'ítaya, nꜛ tɛsalvarowa iga Cristo ojpa-isa' sej.

¹¹ Ayejsan iga inón, sino que nꜛ tipaktokej ipan Dios iga ticredowaj pan toTɛko Jesucristo, iwán iga Cristo kichij iga matonokan tamelá wan Dios.

Adán iwán Cristo

¹² Ijkón inán, iga itechko sɛ taga' yej akichij ken Dios kine', ómpaya pɛwa' iga mochíwa yej ayɛkti ipan inín tajli, inón iga mikilo, iwán inán nochi miki iga nochi kichíwaj yej ayɛkti.

¹³ Áchtosan kuꜛ' aya onoya ley, mochijtoyay yej ayɛkti ipan inín tajli; e' kuꜛ' ateyi ley, ayagaj wel kitɛlwiá iga kichijto' yej ayɛkti.

¹⁴ Desde iga onoya Adán este iga Dios kimá' ley in Moisés, mikikej nochi gente. Mikikej malej iga ayá' kiyokachijkej yej Dios kijtoj iga amo mamochíwa; Adán, kena, kiyokachij yej Dios kijtoj iga amo mamochíwa.

Wel mojtowa iga Adán achi ijkómpasan ken Cristo.

¹⁵ E' yej kichij Adán awel tikijtowaj iga ijkómpasan iwán inón yej Dios tɛpetzmaqokawij. Iga itechko Adán mia' mikikej, e' majya sej Jesucristo isɛlti kichij iga Dios mateꜛe'íta iwán tɛmaqokawij iga tɛsalvarowa.

¹⁶ Inón yej Adán kichij yej ayɛkti, awel tikijtowaj iga ijkómpasan ken imakoka Dios yej tɛmaka iga tɛsalvarowa. Iga sɛ yej Adán kichij yej ayɛkti, mojtowa iga kajasi iga nochi

mamocastigaro; e' imakoꝓa Dios kichiwá iga wel teye'ita, malej iga tikchijkej mia' yej ayękti

¹⁷ Puej siga itechko sešan taga' yej kichij yej ayękti, nochi gente miki; iga yej kichij se' taga' yej itoꝓa' Jesucristo, majya sej wel tepalewiá iga ayí' timikiskej iga Dios te-ikneliá.

¹⁸ Ijkon ken itechko Adán iga kichij yej ayękti, nochi gente mikij, ijkonsan no iga Cristo yej kichij yej pox yekti, kichij iga Dios makiye'ita nochi gente wan maonokan iwán nochipa.

¹⁹ Ken tikijtowaj iganan se taga' ayá' tacedoj iga kichij yej ayękti, nochi kimopa'; ijkonsan no iga se taga' yej itoꝓa' Jesús tacedoj, kichij iga Dios makiye'ita pox miakejmej.

²⁰ Dios kimá' iley Moisés iga matikmatikan iga tikchijwaj yej ayękti. E' malej iga pox nesi iga mochiwa yej ayękti, majya sej Dios kinextij iga te-ikneliá.

²¹ Ijkon iga nochi tejemen tikchijwaj yej ayękti, iwán inon iga nochi timikij; e' inán iga Dios pox te-ikneliá iwán teye'ita iga timoconfiarowaj pan toTęko Jesucristo, nochipa tonoskej wan yej.

6

Tisenmikięeja iwán Cristo, ijkonsan no iwán tisen-ojpa-isaskej

¹ ¿Te tikijtoskej? ¿Ix tikteki'chijoskej yej ayękti iga Dios majo' mateperdonaro?

² ¡Ayá! Tejemen ken kuá' timikięeja iga tikajtęjkeja iga tiktekichijwaj yej ayękti; ¿kén weljo' matikchijtokansan yej ayękti?

3 ¿Ix ayá' ankimatij iga yej timobautizarojkej* iga ticređojkej ipan Cristo Jesús, no ken kuá' tisenmikíkeja iwán?

4 Iga kuá' timobautizarojkej, íkuá' timosentokkej iwán. Ijkón ken toTaj ki-ojpa-ixitij Cristo iga iweyi poder, ijkón inán teojpa-ixitij iga matiye'nemíkanya pan iyojwi.

5 Siga kuá' timobautizarojkej, tisenmikíkeja iwán Cristo, ijkónsan no iwán tisen-ojpa-isaskej.

6 Tikmatij iga to-ikyapanemilis moclavaroj wán Cristo ipan cruz, iga inón yej teyoltilanaya iga matikchiwakan yej ayekti mamíkiya iga ayo' máj matikchijtokan yej ayekti.

7 Yej mi'ya, ayo' kichiwa yej ayekti.

8 Siga tisenmikíkeja iwán Cristo, tikmatij no iga tonoskej iwán.

9 Tikmatij iga kuá' Cristo ojpa-ísa'ya kan miktoya, ayo' sej mikis nikeman.

10 Cristo migui' sesan vej iga makiperdonaro nochi yej mochiwa yej ayekti; e' inán iga sej isato', kichijto' ken Dios kineki.

11 Ijkónsan no amejemen ximomachilikan kenkuá' anmiktókeja iga ayo' wel ankichiwaj yej ayekti, e' xisatokan iga xikchiwakan ken kineki Dios, iga ansetitokej wán Cristo Jesús yej toTeko.

12 Amocuerpoj keman mikis, e' inán mitztekimakasnekij iga xikchiwakan yej ayekti, inón iga amo ximoyolyamanakan iga xikchiwakan yej ayekti ken mitzyoltilanaj amocuerpoj.

13 Ni alín amocuerpoj amo makichiwa yej ayekti. Majwa' xikchiwakan yej Dios kineki iga

* 6:3 6:3 Xikita glosario "Bautizar".

manesi iga anmikíkeja wān an-ojpa-isákeja sej. Ximomakakan iga nochi amocuēroj makichīwa yej yekti ken Dios kineki.

¹⁴ Ijkón ay'ya wel mitztekimakaj amocuēroj iga xikchīwakan yej ayēkti iga ayo' mitztekimatokej la ley, sino que inān amonokej iga Dios mitzikneliáj.

Matimixkuītikan ipan toknimej yej tēkoyojkej, yej kijliáj esclavo†

¹⁵ ¿Kén tikijoskej? ¿Ix tiawij tikchīwatij yej ayēkti iga ay'ya tētekimaka la ley, iwān iga san Dios te-ikneliá? ¡Ayéj ijkón!

¹⁶ Amejemen ankimatij siga ankitemowaj iga agaj mamochīwa amotēko, amonoskej ken iyescłavojmej iwān ankichīwaskej ken yéj mitztekimakaj; siga mitztekimakaj iga xikchīwakan yej ayēkti, anmikiskej. E' siga ankichīwaskej iga Dios maono iga amoTēko, ankichīwaj ken yéj kiye'ita.

¹⁷ Nikmaka gracias Dios, malej iga ikyay ankitekichijtoyaj yej ayēkti, e' inān ankimela'credójkeja iga inochi amoalmaj kensan mitzmachtijkej.

¹⁸ Inān ken kuā' anxitomíkeja iga ay'ya ankichijtokej yej ayēkti, inān ankichīwaja ken mitztekimakaj amoTēko Dios.

¹⁹ (Nimitzijkuilowiliáj ijkín iga ximixkuītikan ipan toknimej yej esclavojmej iga amejemen máj wel xikentenderokan nochi.) Ijkón ken ikyā ankiyolmakakej iga ankichijkej kuajkuantas

† 6:14 6:14 Xikita glosario "Esclavo".

yej ayekti iga amocuɛrpojmej, ijkón inán ximomakakan iga xiye'nemikan, iwán xonokan petz san iga Dios.

²⁰ Kua' amejemen an-ilpitóyajo' iga nochipa ankichijtoyaj yej ayekti, ayá' katka ankichíwayaj ken kineki Dios;

²¹ e' ɛtɛ anmotanilijkej ipan yej ikya ankichijkej, yej inán mitzpinajtiáj? Nité. Yej nemij ipan inón ojti, yawij mikitij.

²² E' inán ayo' an-ilpitokej iga ayo' ankitekichijtokej yej ayekti, majwa' ankichíwaja ken kineki Dios. Inín sí, mitzpaléwiáj iga inán anemiskej ken kineki Dios, wán después nochipay amonoskej iwán Dios.

²³ Yej kichíwa yej ayekti, motaniliá iga mamiki, e' yej temakokatiá Dios, inón iga nochipa matonokan iwán iga tisetitókeja wán Cristo Jesús yej toTɛko.

7

Mixkuñtilo ipan yej namiktitokej

¹ Nokniwán yej ankixmatij la ley, ankimátija iga la ley kimandarowa se' miej iga isátogo'.

² Wel timixkuñtiáj ipan se' siwá' yej namiktito'; la ley kijtowa iga awel yawi wán se' taga' miej ónogo' iwewej, e' siga miki iwewej, la ley kixitoma iga wel mamonamikti wán se'.

³ Siga se' siwá' kitoka se' taga' miej isátogo' iwewej, kijliskej iga najnamolnemi; e' siga miki iwewej, siwá' xitomi de la ley, iwán wel monamiktiá iwán se' taga' iwán ayá' mojtowa iga najnamolnemi.

⁴ Ijkonsan nō amejemen nokniwan, ken ansenmikikeja wan Cristo, ay' mitzjuzgarowaj la ley. Inan amejemen itatki se'ya, inonwa' toTeko yej ojpa-isa' kan miktoya, inon iga matikchijtokanya ken Dios kineki.

⁵ Mij tikchijtoyaj yej ayompa kensan kinekiá toalmaj, la ley tetajlantiko iga maj tikelewijkej yej ayekti iga matikchiwakan iga tocuerpoj, iwan ijkon tewiga' kan matimikikan.

⁶ E' inan iga tisenmikikej wan Cristo, ay'ya tejuzgarowa la ley. Inan timoyolpatakeja iwan tikchijwaj ken kineki iyEspíritoj Dios, iga ay'ya tonokej ipan ima' inon ley yej ikyay ikuilijto'.

Ipan nej chantito' yej ayekti

⁷ ¿Tetaj tikijoskej inan? ¿Ix ayekti in la ley? ¡Ayá! Ayéj ijkón. E' nej ayá' katka nikixmatiá yej ayekti siga ayéj iga la ley. Nej ayá' nikmatiá siga ayekti iga manikpiasneki yej ayéj notatki siga la ley ayá' ijkín kijtowaya: “Amo xikpiasneki yej ayéj motatki.”

⁸ E' el pecado momatij de la ley, iwan itechko yej tatekimaka la ley, pan nej kixitij iga manikyolmaka iga manichijwa nochi yej ajayekti. Siga ateyi la ley, el pecado ken mikto' iga até wel kichijwa.

⁹ Ikyá nej aya nikixmatiá la ley wan nitawelonoya; e' kuá' nikixmati' la ley, ken kixitij iga manichijwa yej ayekti, iwan nimigui' iga neyokatij wan Dios.

¹⁰ Iwan nikasi' iga inonsan ley yej katka manemaka vida, majwa' nemiktij iga neyokatij wan Dios.

11 Iga el pecado momatij de yej tatekimaka la ley, nekajkayaj iwán iga inonsan yej tatekimaka, nemiktij iga neyokatij wán Dios.

12 Inán tikijtowaj iga la ley nokta wálaj de Dios, iwán nochi yej tatekimaka pox yękti, Dios kiyę'ita wán tanęxtiliá ken iga se mayę'nemi.

13 La ley yękti, e' inantaj, ¿ix iga itechko la ley iga nimigui'? ¡Ayęj ijkón! Nej notechko iga nimigui' iga nikchij yej ayękti kuá' la ley nenęxtilij yej yękti; iwán ijkón iga ipan la ley neşi iga yej ayękti nikchıwa, poxsay sej ayękti neşi.

14 Tikmatij iga la ley wı' de Dios; e' nej ninakayoj wán nochipa neyoltilana iga nikchıwa yej ayękti.

15 Nej anikojasi yej nikchıwa, iga ayá' nikchıwa yej nikneki, majwa' nikchıwa yej nikjiya.

16 Malej iga ayá' nikchıwa yej yękti yej nikchıwasneki, kena, nikmati iga pox yękti la ley.

17 Ijkón ayo' nej yej nikchıwa, sino que yej ayękti yej chantito' pan noalmaj neyoltilana.

18 Iwán nej nikmati iga ayá' chantito' yej yękti pan noalmaj, iga nochipa neyoltilana iga manikchıwa yej ayękti; puej nej nikchıwasneki yej yękti, e' awel nikchıwa.

19 Anikchıwa yej yękti ken nikneki, majwa' nikchıjto'san yej anikneki.

20 Iwán siga nikchıwa yej ayá' nikneki, ayo' nej yej nikchıwa, sino que yej ayękti yej chantito' pan noalmaj.

21 Ijkón inán nikmati; malej iga nej nikneko' manikchıwa yej yękti, nej nikchıjto'san yej ayękti.

22 Ipan noalmaj nikye'ita iley Dios;

23 e' nikita iga chantito' ipan nej ken tejté yej netekimakato' yej akineki manikchiwa ken nikeljamiki; inonwa' yej ayekti yej chantito' pan nej yej nepresojwijo'.

24 ¡Nimoknomati ken nono'! ¿A' nemanawij de inin nocuerpoj yej ken miktó'ya?

25 ¡Gracias nikmaka Dios iga toTeko Jesucristo nemanawij!

Ijkón inán, nikneki iga manikchiwa yej kijtowa iley Dios, e' ipan nocuerpoj ono' se' ken tejté yej netekimakato' iwán nechíwaltiá yej ayekti.

8

IyEspíritoj Dios teojmaka

1 Inón iga, Dios ayí' kicastigaroj yej setitokej wan Cristo Jesús, yej ayo' nemij ken yejemej kinekij, sino que nemij ken kineki iyEspíritoj Dios.

2 Iga tisetitokej wan Cristo Jesús, iyEspíritoj Dios temaka vida iga ay'ya tikchiwaj yej ayekti; tesalvaroj iwán ay'ya tetekimaka inón ley yej kijtowa iga timikiskej iga tikchiwaj yej ayekti.

3 Iga Dios kichij iga tejemej yej ileypa Moisés awel kichíwaya. Inón ley awel tepalewiá iga tikchiwaj yej tatekimaka, iga nochipa toalmaj kineki matikchiwakan yej ayekti. Dios kititan iPiltzin yej mochij taga' yej nesíá kensan tejemej, yej ayekti tikchiwaj,* iga mamiki iga totechko.

* **8:3 8:3** Ayéj iga Jesús kichij yej ayekti; Heb 4:15 kijtowa iga Jesús ayí' kichij yej ayekti.

Dios ipan icuerpoj iPiltzin kipoloj nochi yej ayękti tikchıwaj.

⁴ Inón kichij iga tejemej wel matikchıwakan ken kijtowa la ley, puej ayo' tikchijtokej ken tiknekiј tejemej sino que ken kineki iyEspırıtıoj Dios.

⁵ Puej yej kichijtokej yej kiyoltilantokej yej ayękti, kejlantokej iga kichıwaj ken yej yejemejpa kinekiј; e' yej kichijtokej ken kineki iyEspırıtıoj Dios, kejlantokej iga kichıwaj ken kineki Dios.

⁶ Siga matikchijtokan ken teyoltilana yej ayękti, inón temiktiá, e' siga matikchijtokan ken kineki el Espırıtıo Santo, nochipa tonoskej wan Dios iwán tonoskej tamelá.

⁷ Iga yej kejlamıkiјsan yej ayękti, inómejwa' kijiјaj Dios; iga akichıwaj ken kineki iley Dios, niga welitij kichıwaj.

⁸ Inón iga, yej kichijtokej yej kiyoltilanaj yej ayękti, Dios awel kiye'ita.

⁹ E' amejemen ay'ya ankichijtokej ken mitzyoltilanaj yej ayękti, sino ken kineki iyEspırıtıoj Dios, iyEspırıtıoj Dios ono' ipan amejemen. Yej ayá' kipiá iyEspırıtıoj Cristo, inón ayéj de Cristo.

¹⁰ Malej iga amocuerpoj mikis iga ankichıwaj yej ayękti, e' siga Cristo chantito' pan amejemej, amoespırıtıoj isato' iga anye'onokej iyıxtaj Dios.

¹¹ Iwán siga chantito' pan amejemej iyEspırıtıoj Dios, inón yej ki-ojpa-ixitij Jesús kan miktoya; inonsan nō Dios yej ki-ojpa-ixitij, nō mitzojpa-ixitiskej iga iyEspırıtıoj yej chantito' pan amejemej.

12 Ijkón nokniwan, inán Dios kineki iga matikchiwakan ayéj ken toalmaj kineki iga matikchiwakan yej ayékti.

13 Siga amejemen ankichijtokej ken amoalmaj kineki iga xikchiwakan yej ayékti, anyawij anmikitij iga anyokatitoskej de Dios; e' siga iyEspíritoj Dios mitzkawaltíaj iga ayo' xikchiwakan yej ayékti, nochipa amonoskej wan Dios.

14 Ipilowan Dios momakaj iga kitokaj ken kinextiliá iyEspíritoj Dios.

15 Puej iyEspíritoj Dios yej mitzmakakej, ayéj se espíritu yej mitzesclawojtiliáj iga sej ximawikan, sino que Espíritu yej kichiwa iga ximochiwakan ipilowan Dios. Iwan inin Espíritu kichiwa iga matikijlikan Dios: ¡Nopáj!

16 Ininsan Espíritu mosetiliá iwan toespíritoj iwan kijtowa iga tejemen ipilowanya Dios.

17 Iwan iga tejemen ipilowan Dios, kajasi iga no matemakakan yej itatki Dios, yej kijtoj iga temakas, iwan tosentatki mochibas wan Cristo, siga inán iwan tiksensufrirowaj, wel no tonoskej ipan cielo kan ono' yéj.

18 Puej nikmati iga inán tejemej yej tiksufrirowaj, ni alin ayá' kaxiliá iwan inon, kuá' keman tisen-onoskej wan Jesús.

19 Inochi yej ono', yej kichij Dios kichixtokej iga magui' maásiya inon día kuá' Dios kichibas iga manesi aja'yéj ipilowan.

20 Iga inochi yej ono', yej kichij Dios yéj kijtoj iga amo maye'onokan,† ayéj iga kinekij, sino iga Dios ijkón kijtoj; e' weljo' sej keman moye'talij

† 8:20 8:20 Gn 3:17

21 iga nochi yej kichij Dios ay' yawij mikitij niga palaniskej, wan paktoskej no kensan ipilowan Dios.

22 Tikmatij iga inan nochi yej Dios kichij tenatokej iwan kimachiliáj ken se siwa' yej pilkualoto' iga taonoltiá.

23 Iwan ayejsan nochi yej Dios kichij yej kualotokej, sino que tejemen no, e' tikpiaja iyEspíritoj Dios yej achto temá'. Iwan tikmatij iga inon kijojneki iga temákasó' máj. Tikmachiliáj iga poxsan tikualotokej, iwan tikchixtokej iga kemasan techiwas ipilowan Dios, íkuá' timomachiliskej íjkanya iga tikpiaskej sé'paya tocuerpoj.

24 Iga tikchixtokej Dios tikmatij iga timomanawíjkejya; e' siga se kichixto' yej kítzto'pa, inon ayo' kichixto'. Yej se kítzto'ya, ¿téjaso' iga makichixto?

25 E' siga tikchixtokej yej aya tikitaj, melá'wa' iga atisiawij iga tikchixtokej.

26 Ijkonan no iyEspíritoj Dios tepalewiá kuá' timosemakasnékija. Iga kuá' titajtowaj wan Dios ayá' tikmatij te tiktajtaniliáj, e' iyEspíritoj Dios tetajtowiliá iyixtaj Dios, te ken ténapa iga kijtowa yej tejemej atikojasij kén tikijtowaj.

27 Iwan Dios yej kixmati te tikejlantokej, kimati te nemi kijtowa iyEspíritoj Dios; iga iyEspíritoj Dios kitajtowiliá yej kicredowaj Dios, íjkón iga Dios kineki iga maye'onokan.

Nochipa tiktaniáj iga Cristo tepalewiá

28 Tikmatij iga Dios tekipanowa iga nochi maye'kisa inomej yej kichokiliáj, inomej yej

Dios kitapejpen iga mamochiwa ken yéj nochipa kejlanto'.

²⁹ Iga yejemej yej Dios ikay kixmati', áchtoya no kitapejpen iga mamochiwakan kensan Jesucristo yej iPiltzin Dios, iga Jesucristo mamochiwa tekoko pan nochi tokniwan.

³⁰ Iwan yej desde áchtoya Dios kitapejpen, kinotza' no, iwan yej kinotza', no ki-omemawij, iwan yej ki-omemawij, no kitalij iga maono itenoj yéj.

³¹ Inán, ¿te tikijoskej de inín? Siga Dios de tejémempa, ¿a'yéj yej wel techiwilij yej ayékti?

³² Dios kine' iga mamiki iPiltzin iga nochi tejemej; ¿kén iga ayá' yawi no temakati nochi yej yéj kipia'?

³³ ¿A'yéj wel kitelwij yej Dios kitapejpen? Ayagaj, iga Dioswa' in yej kijtowa a'yéj ye'nemi;

³⁴ ¿A'yéj wel tecastigaroj? Ni agaj, iga Crístoja' in yej migui' iga tejemen, ayejsan iga inón, sino que ojpa-isa' iwan ono' iladoj iye'ma' Dios iga tetajtowilijto'.

³⁵ ¿A'yéj wel kikawaltij iga Cristo matechokili? Ayagaj, niga nité wel kikawaltij iga Cristo matechokili. ¿Ix wel kua' tecastigarowaj, o kua' tejté teyolmiktijto', iwan kua' tetemojtinemij iga matecastigarokan, o kua' apistaj, o kua' ayo' tikpiaj totzótzol, o kua' temiktijnekij?

³⁶ Ken kijtowa kan ijkuilijto':

Iga san nimitztokaj, nochipa nemiktijnekij.

Ne-itaj ken borregoymej‡ yej yawij kimiktij.

‡ 8:36 8:36 Xikita glosario "Borrego".

37 E' ipan nochi inín, nochipa tiye'kisaj iga tepalewiá Cristo yej techokiliá.

38 Inán nikhmela'mati iga ateyi nité yej wel kikawaltij iga Dios matechokili. Niga matemiktikan, niga kuá' tísatokej, niga angelejmej,§ niga Tzitzimi' iyangelejmej, niga yej ono' inán, niga yej wí'o',

39 niga yej ajko ono', niga yej ono' taltampa. Nité yej Dios kichij, awel kikawaltíá iga Dios mateneki ken yéj tenextilij ipan Cristo Jesús yej toTéko.

9

Ken iga Dios kitapejpen la gente de Israel

1 Nej niktoka Cristo, iwán iyEspíritoj Dios nenextiliá pan noalmaj iwán ne-ijliá iga ayá' nemi nitakajkayawa; nemi nimitzijliáj nokta iga

2 poxsan nimoknoṁati, iwán nochipa kwaloto' noalmaj.

3 Niknekiá katka manikpalewikan nokniwan israelitajmej yej de nejémempasan. Este katka Dios ayo' maneye'ita iwán manikajtewa iyojwi Cristo, e' siga katka inón kipalewiayaj yejemej iga makina'techokan Dios.

4 Yejemej israelitajmej, iwán Dios kitapejpen iga mamochiwakan ipilowan. Dios kinextilij ipoder iga onoya iwamej kuá' kichij pacto iwán yejemej. Dios kimá' iley Moisés. Dios kinextilij ken iga makiweyimatiłtikan kuá' monechkowaj tiopan, iwán kijlij yej yawi kimakati.

5 Yejemej ipilowan ipilowampa to-ikyapatajwewetkej, ipan inomej walaj Cristo,

§ 8:38 8:38 Xikita glosario "Ángel".

iwán yéj Dios yej kimandarowa nochi, nochipa mamoweyimatilti. Ijkónyawa'.

⁶ Ayéj iga Dios ayá' kichij ken kijlij israelitajmej; iga ayéj nochi gente yej israelitajmej imela'pilowán Dios, iga ayá' nochi moconfiarowaj ipan Dios ken iyikyapatajwewejmej Israel* yej nō itōkã' Jacob.

⁷ Niga nochi ipilowán Abraham ayéj nochi imela'pilowán; sino que Dios ijkín kijlij: “Petz mopiltzín Isaac yawi kipiwiti mopilowán.”†

⁸ Inín te-ijlijneki iga ijkón ken Isaac naceroj iga Abraham moconfiaroj ipan yej kijtoj Dios; tejemey nō ipilowán Dios ayéj iga tejemej ipilowán Abraham, majwa' iga timoconfiarowaj ipan yej kijtoj Dios.

⁹ Dios kijlij Abraham yej yawi mochiwati: “Se xiwi' sej niwí', iwán íkuã' Sara kítasya se ipiltzín.”‡

Dios wel kichíwa ken kiyé'ita

¹⁰ Amo xikelkawakan yej mochij wán kuátejmej yej ipilowán Rebeca wán Isaac yej to-ikyapatajwewej;

¹¹⁻¹³ kuã' aya katka onoyaj kuátejmej, niga kichíjkaja yej yekti niga yej ayekti, e' Dios kijlij Rebeca: “Yej tekoko yawi kichiwati ken kineki tetzoyo'.” Inón nō senyawí wán se' kan ijkuilijto', kijtowa: “Nikne' Jacob, e' Esaú nikijiya'.” Ijkón nesi iga Dios wel kitapejpena ken kineki,

* **9:6 9:6** Israel; taga' yej nō itōkã' Jacob. † **9:7 9:7** Gn 21:12

‡ **9:9 9:9** Gn 18:10

ayéj iga agaj kichíwa tejté, sino que iga Dios kiyokanotza'.§

¹⁴ Inán ¿té tikijtoskej? In Dios, ¿ix kichíwa yej ayekti? ¡Ayéj ijkón!

¹⁵ Iga Dios kijlij Moisés: “Nia nikchokilítí yej nej nikneki manikiknelí, iwán nikiknelíj yej nej nia nikiknelítí.”*

¹⁶ Inón iga ayejsan iga agaj makineki, niga mamoteki'topewa iga makalaki, tájma'wa' Dios yej yéj kikneliá.

¹⁷ Iga kan ijkuilijto' kijiá Faraón: “Nimitztalij iga rey iga nimitznexilij nopoder iwán iga ipan inín tajli noyan mane-ixmatikan.”

¹⁸ Inón iga Dios kikneliá a'ya iga yéj kiknelijneki, iwán kiyoltakuawiliá, a'ya iga yéj kiyoltakuawilijneki.

¹⁹ Iwán tej tine-ijlij: “Siga ijkón, ¿te iga Dios kijtowa iga itechko taga'? ¿A'yéj wel kijtowa iga amo mamochíwa ken Dios kineki?”

²⁰ ¡E' tej taga! ¿Te moteki in tej iga ximokueso iwán Dios? ¿Ix wel an se komi' makijli yej kichij: “¿Te iga ijkín tinechij?”†

²¹ Pues yej kichíwa komi' wel kichíwa ken yéj kineki, iwán ipan inonsan konsoki' wel no kichíwa yej námol awel kikui, iwán se' yej a'san nesí wel kikui.

²² ¿Iwán te tikijtoskej?, Dios kine' matanexilí ken tacastigarowa iwán iga nochi makitakan ipoder, inón iga Dios ayá' kikuesowilij yej kajasiá iga makicastigarokan yej onóyaja ga poliwiskej.

§ 9:11-13 9:11 Gn 25:23; Mal 1:2,3

* 9:15 9:15 Ex 33:19

† 9:20 9:20 Is 29:16

23 Ijkón kichij iga kinextij iweyipoder ipan tejemēn yej te-iknelij, yej desde áchtosan tetapejpen iga matonokan kan yéj ono'.

24 Dios tenotza', akita siga tijudiyojmej o ayéj.

25 Ken ijkulijto' ipan ama' yej kijkuiloj Oseas: Yej ayéj katka nopilowan, nia nikijliti iga nopilowan.

Yej aniknekiá, niknekis.‡

26 Iwan ompa kan mitzijlijkej: "Amejemen ayéj nopilowan",

ompa yawij mitzijlitij ipilowan Dios yej isato'.§

27 E' iga israelitajmej, Isaías kijtoj ijkín: "Malej iga israelitajmej pox miakej ken tikita xajli yej ono' lamartenoj, petz alín kawiskej yej yawij mosalvarotij.

28 Ayá' wejkatís toTeko yawi kijuzgaroti nochi yej onokej ipan inín tajli."*

29 Ken Isaías ikya kijtoj:

Siga toTeko yej nochi wel kichiwa, ayá' katka kikajtewaya alín toknimej iga tejemej matonokan,

tipoliwíkaja ken yej chantitoyaj altepe' Sodoma† iwán Gomorra.‡

Judiyojmej akentenderojkej

30 ¿Te tikijoskej? Iga yej ayéj israelitajmej yej ayá' kitemowayaj iga maye'onokan iyixtaj Dios, yejémejwa' in yej máj ye'onokej iyixtaj Dios iga moconfiarowaj.

‡ 9:25 9:25 Os 2:23 § 9:26 9:26 Os 1:10 * 9:28 9:28 Is 10:22,
23 † 9:29 9:29 Dios kitatij yej chantitoyaj altepemej Sodoma
iwán Gomorra iga kichijkej yej ayékti. Gn 19. ‡ 9:29 9:29 Is 1:9

³¹ E' israelitajmej yej kitokayaj la ley, yej katka maye'onókanya iyixtaj Dios, awel kichijkej ken kijtowa inón ley.

³² ¿Te iga? Iga ayá' kitemojkej iga maye'onokan iyixtaj Dios iga san moconfiarowaj ipan Cristo, majwa' kinekiáj iga Dios makiye'ita yej kichiwaj. Inón iga ken mokxiwitekikej ipan te'ti, iwán inonwa' te'ti kijtojneki Cristo. §

³³ Ken kijtowa kan ijkuilijto':

Nej niktaliá ipan altepe' Sion* se te'ti kan mokxiwitekilo, se te'ti yej tawetziltiá.

Yej moconfiarowa ipan inón te'ti ayá' mopinajtij. †

10

¹ Nokniwan, noalmaj kineki iga israelitajmej mamosalvarokan, iwán kuá' niktenevia Dios, inón niktajtaniliá.

² Niye'tajtowa iga yejemej, poxsan kiweyimatiá Dios, e' ayá' kimatij ken iga makiye'chiwakan.

³ Iga ayá' kimatij ga Diossan yej kichywa iga se maye'ono iyixtaj yéj, majwa' yejemensan kitemowaj imatikamej iga maye'onokan iyixtaj Dios, e' ayá' kichiwaj ken yéj kijtowa.

⁴ Iga wálaj Cristo, kitamiko iley Moisés, inán nochi yej moconfiarowaj pan Cristo ye'onoskej iyixtaj Dios.

§ 9:32 9:32 Is 18:14 * 9:33 9:33 Sion se' itoká' Jerusalén.

† 9:33 9:33 Is 28:16

⁵ Iga se maye'ono iyixtaj Dios iga kichiwa ken kijtowa la ley, Moisés ijkín kijkuiloj: “Yej kichiwa ken kijtowa la ley, iga inón mosalvaroj.”*

⁶ E' yej kisentaliá iyalmaj pan Dios iga maye'ono iyixtaj, ayí' tatajtani: “¿A'yéj tejkawis ipan cielo? —inín kijtojneki iga matiktemowikan Cristo,

⁷ niga ayí' tatajtani: ¿A'yéj temoj kan onokej iyalmajmej yej miktokoj?” —inín kijtojneki iga matikojpa-ixitikan sej Cristo ken kua' míkto'o'.

⁸ ¿Wan tetaj kijtojneki? “Itájtol Dios mona'san ono', iga ono' ipan moten iwán ipan moalmaj.” Ininwa' in itájtol yej ipan matimoconfiarokan, yej nejemej nikpowaj.†

⁹ Siga tikijtowa iga Jesús toTeko, iwán ipan moalmaj ticredowa iga Dios ki-ojpa-ixitij kan miktoya, mitzsalvaroj.

¹⁰ Puej iga toalmaj ticredowaj, iwán ijkón iga tiye'onoj iyixtaj Dios, e' iga toten tiknojma-ijtowaj iga Jesús toTeko iwán ijkón iga Dios tesalvarowa.

¹¹ Kan ijkuilijto' itájtol Dios kijtowa: “Nochi yej kisentaliá iyalmaj pan yéj, ayá' mopinajtij.”‡

¹² Dios kiye'ita judiyojmej wan yej ayéj judiyojmej; puej tonochin tikpiáj sesan toTeko, iwán a'san nesi kipalewiá yej kitajtaniliá.

¹³ Iga ijkín kijtowa itájtol Dios kan ijkuilijto': “Nochi yej kitenewiá itoka' toTeko yawi mosalvaroti.”§

* **10:5 10:5** Lv 18:5 † **10:8 10:8** Dt 30:12-14 ‡ **10:11 10:11**
 Sal 34:22 § **10:13 10:13** Jl 2:32

14 E' ¿kén yawij kitenewitij toTęko Jesucristo siga ayá' nemi kicředowaj ipan yěj? ¿Iwán kén kicředoskej ipan yěj siga aya nemi kikakij de yěj? ¿Iwán kén yawij kikakitij siga ayagaj nemi kitatapowiáj de yěj?

15 ¿Kén yaskej kipowatij ye'noticiaj siga ayagaj kititani? Ken kijtowa kan ijkuilijto' itájtłl Dios: "¡Pox mōnsaj kuā' asij yej kipowaj ken iga matonokan tamelá, yej tematiltikoj ye'noticiaj!"*

16 E' ayá' nochi kicředojkej ye'noticiaj. Ken kijtowa profeta Isaías: "NoTęko, ¿ix agaj netajtłlkuilijkej yej nikpojkej?"†

17 Ijkón yej moconfiarowaj ipan Cristo, achto kikakij itájtłl. Iga makikakikan, kineki agaj makipowa inón ye'noticiaj.

18 E' nimitztajtani: ¿Ix an kikakikej in itájtłl Dios? ¡Kena, kikakikej! Kan icyay ijkuilijto' kijtowa:

Itájtłl yejemen mokagui' noyan ipan tajli, iwán itájtłl ási'ya este ipan itajtamiyan inin tajli.‡

19 E' sej nitatajtani: In israelitajmej, ¿ix an aya kimatij? Moisés áchtoya kijtoj:

Nia nikchiwati iga xiyolkuesiwi iga se país yej ayěj niga país; nikchibas iga ximokuejkuesokan wan se país yej pox yoltakuakti'.§

20 Isaías sej mixewiá iga kijtowa:

Yej ayá' netemowayaj, neasikej; iwán nikixnextilijkej yej ayá' netemowayaj.*

* 10:15 10:15 Is 52:7 † 10:16 10:16 Is 53:1 ‡ 10:18 10:18 Sal 19:4 § 10:19 10:19 Dt 32:21 * 10:20 10:20 Is 65:1

21 Iwán kua' tajtowa de israelitajmej, Isaías kijtowa: "Semilwi' nimapatajtoya iga niknozttoyaj yej pox yoltakuaktikej iwán akinekij manetokakan."†

11

Dios ayá' kisenkokajtej israelitajmej

1 Inán nitatajtani: ¿Ix an Dios kitepo'má' israelitajmej? ¿Ayéj ijkón! Nej no ni-israelitaj yej ipilowampa Abraham ipilowan, iwán itríbuja Benjamín.

2 Dios ayá' nemi kitepo'maka yej yéj kitapejpen, inón yej pox ikyay kixmati. ¿Ix ayá' ankimatij kan ikuilijto' ipan itájtól Dios yej kichij Elías, kén iga yéj kua' kitenewij Dios kitelwij israelitajmej? Kijtoj:

3 "NoTeko, kimijmiktíjkeja moprofetajmej, inewi moaltar kixixitinkej, iwán nejsan nikawi' noselti, e' nej no nemiktijnékija."*

4 E' Dios kijlij: "Nikpiao' siete mil tajtaga' yej netokaj, yej ayá' motankuaketzaj iyixtaj ídolo yej kijliáj dios Baal."†

5 Puej ijkonsan no inán, acho' kawikej sekin israelitajmej yej Dios kiknelij iwán kitapejpen.

6 Iwán siga san kitapejpen iga yéj ijkón kiknelij, ayejwa' iga se kichij yej yékti; porque siga se makichíwapa yej yékti, ayejwa' iga ta-ikneliá Dios.

† 10:21 10:21 Is 65:2 * 11:3 11:3 1 R 19:14 † 11:4 11:4 1 R 19:18

7 Inán, ¿kén tikijoskej? Israelitajmej ayá' kasikej yej kitemowayaj, e' yej Dios kitapejpen, kena kasikej. Sekin moyoltakuawilijkej.

8 Ken kijtowa kan ijkuilijto' itájtol Dios: “Dios kikuatapololtij inomej; kimá' iyixmej, e' kixtzakua' iga amo matachakan iwán kimá' inakamej, e' ayá' takakij, iwán este inán ijkón onokej.”‡

9 David no kijtowa:
Kua' nemi ilwichiwaj, mamawetzikan ken totot'
yej kawí ipan kuakakax
iga makikitzkikan iga makicastigarokan.§

10 Iyixmej, mapajpachatiakan, iga amo matachakan,
matepotzwijkoliwikán iwán ijkón makawikan.*

Kén iga mosalvarowaj yej ayéj judiyojmej

11 Nimitztajtani inán: ¿Ix an mela'wetzikej in israelitajmej wan ayí' moketzaskej? ¡Ayá'!, e' kua' israelitajmej ayá' kichijkej ken kijtowa Dios, iga inón mosalvarojkej yej ayéj israelitajmej, iga inán mamixkujtikán israelitajmej iga makicredokan no.

12 Iwán siga pan yej ayompa kichijkej judiyojmej, moye'chijkej nochi tokniwan yej onokej ipan inín tajli, iwán siga kan wetzikej judiyojmej, moye'chijkej yej ayéj judiyojmej, imajya sej moye'chijaskej siga judiyojmej inochimej sej makitokakan Dios!

13 E' nimitzijlijnekij tejté amejemen yej ayéj anjudiyojmej. Nej iyapóstol Dios iwán yéj netitan

‡ 11:8 11:8 Is 29:10 § 11:9 11:9 Sal 69:22 * 11:10 11:10 Sal 69:23

iga itájtɔl manikpowili yej ayéj judiyojmej, pox nikyé'ita iwán nikyɔlmaka iga nikchíwa yej nețekimakakej.

14 Nikneki iga tokniwán yej de nejémenpasan judiyojmej makichíwasnekikan yej amejemen ankichíwaj iga ankixmatij Cristo, iwán ijkón wel mamosalvarokan.

15 Puej siga kuá' judiyojmej moyokatijtoyaj wán Dios, ompa pewa' iga yej ayéj judiyojmej wel moyoltaliáj wán Dios, ¿ix aya'taj majya sej kuá' yejemej mamokuepakán? Iga ijkón kichíwaskej, ken ojpa-isaskej sej kan miktoyaj.

16 Puej siga agaj kimaka iga ofrenda Dios yej áchtopa pan yej mochíwa iga itixyo trigo, inón kijtojneki iga nochi tixti nɔ Dios kiyé'ita. Iwán siga agaj kimaka iga ofrenda Dios inelwayo se kuawi', nɔ nochi imajma' inón kuawi' Dios kiyé'ita.

17 Sekin judiyojmej yej ken imela'majma' olívojkuawi',† kimajmatzontekkej iga Dios ay' kiyé'ita'. Iwán tej ken se imajma' olívojkuawi' yej momati ipan kuayoj yej ípan mitzin-jertarokkej. Ijkón iga tej tixwato' ipansan inón inelwayo iwán wel tonó' iga san inón iyayo.

18 E' amo ximomachíli iga tej majya sej que imela'majma' olivo, yej kitojneki judiyojmej. Siga timomachíliá iga tej majya sej, xikejlamiki iga ayéj mopan ixwato' inelwayo, sino tej tixwato' pan inelwayo mela'olívoj.

19 Anka tikijtoj: “Kena, e' imajma' kit-zojtzontekkej iga nej mane-injertarokan ipan

† 11:17 11:17 Xikita glosario “Olivo”.

olivojkuawi'."

²⁰ Ijkón; e' kitzojtzontekkej iga ayá' moconfiarojkej ipan Dios, iwán tej ompa tonó' iga san timoconfiaroj ipan Dios. Inón iga amo ximoweyimati, sino que achi xikmajmawili Dios.

²¹ Siga Dios ayá' kiknelij imela'majma' olivo, welsan nō tej ijkón mitzchīwilij.

²² Ta' xikita kén iga Dios pox ta-ikneliá, e' nō kikuesowa yej ayá' kichīwa ken yéj kijtowa. Ijkón kichij wán inōmej yej wetzikej, e' tej pox mitziknelij. Dios mitzikneliao' miej timoconfiarowa ipan yéj; e' siga ayá', tej nō yawij mitzontekitij.

²³ E' siga judiyojmej sej kicredowaj, yejemej sej ki-injertaroskej pan olivojkuawi'; iga Dios kipiá poder iga sej makichīwa.

²⁴ Siga tej yej ayéj tijudiyoj, mitzontekkej ipan kuayojolivoj, iwán mitzinjertarojkej ipan ye'olivojkuawi', malej iga tej ayéj de inómbapa kuawi', imajya sej judiyojmej, yej imela'majma' olivojkuawi', yawij ki-injertarotij kan achto onoyaj!

Kén iga yawij mosalvarotij judiyojmej

²⁵ Puej nokniwan, nikneki xikmatikan yej aya momatiá, yej Dios kichīwasneki, iga amo ximomachilikān iga poxsan antamatij: israelitajmej ayá' momela'yoltakuawilijkej inochimej, e' ijkón onoskej este que mamasi yej ayéj judiyojmej, yej yawij kicredotij ipan Cristo.

²⁶ Kua' inón mochiwas, íkua' nochī israelitajmej mosalvaroskej, puej kan ijkuilijto' kijtowa:

Yej tasalvarowa yawi w̄izeti de Sion,‡
iwán yej ayēkti kichijkej israelitajmej, yawij
kiperdonařotij.§

²⁷ Iwán in̄n nikch̄iwas wan yejemen,
kua' nikperdonarowilij yej kichijkej yej ayēkti.

²⁸ Iga judiyojmej akicredoijkej ye'noticiaj, ki-
jiyakej Dios, ijkón in̄n mitzojtapowilijkej ame-
jemen yej ayéj anjudiyojmej iga wel xicredoķan
ye'noticiaj. E' Dios kinéki-o' in judiyojmej iga
Dios kitapejpen iyikyapatajmej.

²⁹ Puej yej Dios temaka, ayo' sej tekuiliá, niga
yej kinotza', ayá' ompay kisenkokajtewa.

³⁰ Amejemen ikya ayá' ankichijkej ken kineki
Dios, e' iga judiyojmej ayá' kichijkej ken
Dios kineki, in̄n iga in̄n amejemen Dios
mitzikneliáj.

³¹ Ijkonsan nō yejemen in̄n ayá' kichiwaj
ken Dios kineki, e' iga san Dios makinextili
iga wel kikneliáj yejemen, kensan nō amejemen
mitziknelijkej.

³² Dios kikajtej nochi iga makichiwakan yej
ayēkti, iga in̄n Dios nochi wel makikneli.

³³ ¡Poxsan weyi itamatilis Dios iwán Yéj pox
kojasi yej kich̄iwa! Ayá' wel tikojasij ken
yéj kejl̄amiki, niga wel tikentenderowaj yej yéj
kich̄iwa.

³⁴ Puej, ¿a'yéj kimati yej toTēko kejl̄amiki? ¿O
a'yéj kimachtij?*

³⁵ ¿Ix ono' an agaj yej achto kimá' tejté toTēko
iga yéj in̄n kenkua' kixtawa yej kimakakej?

‡ 11:26 11:26 Sion se' itōķa' Jerusalén.

§ 11:26 11:26 Is

59:20,21

* 11:34 11:34 Is 40:13,14

36 Nochi itatki Dios, iga yéj nochi kichij iga yéjsan. ¡Nochipa mamoweyimatilti Dios! Ijkonýawa'.

12

Xiksentalikan amoalmaj ipan Dios

¹ Nokniwan, Dios te-ikneliá, inón iga nimitztajtaniliáj iga amejemen nochipa xiye'nemikan ipan iyojwi. Iga ijkón ankichiwaj, ken tikita ankimakaj Dios se ofrenda yej isato'. Inón Dios kiye'ita, ijkón nokta kajasi iga matikye'weyimatiltikan.

² Ayo' xikchiwakan ken kichijtokej toknimej yej ayá' kixmatij Dios, majwa' ximomakakan iga Dios mamitzyolpatakan iga se'ya ken antajlamikij, ijkón ankimatiskej yej Dios kineki iga xikchiwakan, yej pox yekti, yej kiye'ita Dios.

³ Nikmati iga Dios poxsan ne-iknelij iga netalij iga iyapóstol, inón iga nimitzijliáj iga sejsé de amejemen, amo agaj mamomachili iga majya sej que se'. Majwa' sejsé de amejemen ximomachilikan kén amonokej, ke'san Dios mitzchiwaltiaj iga ximoconfiarokan ipan yéj.

⁴ Ijkón ken tejemej ayá' tikpiaj petz tokxi wan toma', sino que tikpiajo' máj sekin miembros iwán nochi inomej ayá' sesan itekipanolmej kipiáj,

⁵ ijkonsan no tejemen, malej iga timiakejmej, e' pan Cristo sesan timochiwaj, iwán tonochin tisetitokej ipansan se.

⁶ Dios temá' sese'pa yej wel tikchíwaj, kensan yéj kiye'ita temá'. Siga Dios tetajtól maka iga matikijtokan itájtól, matikchíwakan san ke' iga timoconfiarowaj pan yéj.

⁷ Siga Dios temá' iga wel matikchíwakan tejté iga agaj, matikye'chíwakan. Siga Dios temá' iga wel titamachtiáj, inón nokta matikchijtokan.

⁸ Siga Dios temá' iga wel titayólchikawaj, inón matikchijtokan. Siga Dios temá' iga wel matitamakokawikan tejté, matikyólmakakan iga tikchíwaj. Yej ono' iga ken tzontekon pan tejté kan Dios kitálij, makiye'chíwa itekipánól; yej kipalewiá yej amotapialiáj, mapaki iga kichíwa.

Kén makichíwa yej kitoka Cristo

⁹ Ximomela'sepanchokilikan wan amoknimej. Xikijiyakan yej ayékti iwán xikchíwakan yej yékti.

¹⁰ Ximosepanchokilikan wan amoknín ken sesan amotaj; xikita moknín majya sej que tej.

¹¹ Amo ximosemakakan, xikyólmakakan yej ankichíwaj, te xiyólpaktokan iga xikchíwakan yej Dios kineki.

¹² Mie j ankichixtokej toTeko, xipaktokan. Kua' tejté mitzyólmiktiáj, xikijyowikan iwán amo xikajtewakan iga ankitenewiáj toTeko.

¹³ Xikpalewikan tokniwan yej kitokaj Dios yej amotapialiáj. Xikomemawikan wejkachanej yej akipiáj kan kochij.

¹⁴ Xiktajtanilikan Dios iga maye'onokan yej mitziknochíwaj iwán ayá' xikmalijlikan.

¹⁵ Xipakikan wan yej paktokaj, iwán xisenchokakan wan yej nemi chokaj.

16 Xonokan ken sesan amoalmaj wan amokniwan. Amo ximoweyimatikan, ximomachilikan kensan inomej yej ayá' motapialiáj. Amo pansan amejemen ximomachilikan iga poxsan antamatij.

17 Siga agaj mitzchiwiliáj yej ayekti, amo no ijkón xikchiwilikan. Nochipa xiktemokan yej yekti iga xikchiwilikan nochi tokniwan.

18 Xikchiwakan este kan máj anwelitij iga xonokan tamelá iwán nochi.

19 Nokniwan yej nimitzpoxxokiliáj, amo ximomatikan kua' agaj mitzchiwiliáj yej ayekti, xikajtwelikan iga Dios makicastigaro yej mitzchiwilijkej yej ayekti; iga ijkín kijtowa kan ijkulijto': "Nejwa' in yej nitacastigarowa; nej nia nimomatiti wan inón yej kichij yej ayekti, kijtowa toTeko."*

20 Iwán no kijtowa: "Siga yej mitzijiya mayana, xikamaka, siga ataneki, xikamaka; iga inón tikchiwas, este xajxaygatatawiás iga pinawas."†

21 Amo ximoyolyamana iga xikchiwa yej ayekti, majwa' xiktanili yej ayekti iga xikchiwa yej yekti.

13

1 Nochi toknin makichiwa ken tatekimaka tekiwajmej. Iga ateyi nisé tekiwaj yej ayá' kitálij Dios, iwán yej inán mandarowa, Dios kitálij.

2 Inón iga yej ayá' kichiwa ken tatekimaka tekiwajmej, ayá' nemi kichiwa ken Dios tatekimaka.

* 12:19 12:19 Dt 32:35 † 12:20 12:20 Pr 25:21, 22

Yej akichijwa ken tatekimaka tekiwajmej, inón yawij kicastigarotij.

³ Tekiwajmej ayá' onokej iga makimajmajtikan yej kichijwaj yej yekti, yejemen onokej iga yej kichijwaj yej ayekti. Siga ayá' tikneki xikmaj-mawilijto tekiwajmej, xitawelono, iwán tekiwajmej mitzye'itaskej.

⁴ Tekiwajmej nemi kichijwaj ken Dios kineki iga xitawelono. E' siga ayá' tiye'nemi, ijkón sí ximajmawi; tekiwaj ayá' báldejsan mandarowa, wel nō tacastigarowa. Tekiwaj kichijto' ken Dios kineki iga kicastigarowa yej kichijwa yej ayekti.

⁵ Inón iga matiktajtōlkuikan tekiwajmej, ayejsan iga amo matecastigaro, sino que tikmatitokej ipan toalmaj iga matiye'nemikan nokta.

⁶ Inón iga amejemen ankixtawaj yej kijliáj impuestos,* iga Dios ompa kitālij tekiwajmej iga makichijwakan itekipanōlmej ken kajasi.

⁷ Nochi yej mo-ixtāwa, xixixtawakan, san katiapa impuesto yej ono', xik-respetarokan nochi yej kajasi.

Matimosepanchokilikan

⁸ Amo agaj xikdeberokan ni alín, majwa' ximosepanchokilikan; iga yej kichokiliá iyiknīn, kichija ken tatekimaka la ley.

⁹ Ijkin tatekimaka Dios: “Siga tinamiktito', amo xaj wān se'; amo xitamikti, amo xitachteki, amo xitanamōlpanti, amo xikpiasneki yej se' itatki”; e' siga “tikchokiliá moknīn kensan tej

* **13:6 13:6** Xikita glosario “Impuestos”.

timochokiliá”, nemi tikchíwa nochi ken tateki-maka la ley.

¹⁰ Yej kichokiliá iyikn̄n awel kichíwiliá yej ayekti; inón iga, siga tiknekij tokn̄n, pan inón tikchíwaj ken kijtowa nochi la ley.

¹¹ Xikchíwakan nochi in̄n iga ankimatij na'ya wí' toTeko. Akajasi iga matikochtokan, majwa' matisatokan iga majya na' ono' iga temanawiki Dios que kuá' iga achto ticredojkej itájtól.

¹² Ken tikita pox tayówaya, iwán ayo' wejkáj iga tanesis; inón iga matikajtewakan iga tikchíwaj yej ayekti, yej kichíwa yej ayekti ken kuá' ono' kan takomichkan. Matikchíwákanya yej yekti ken kichíwa yej nemi kan tawilpan iwán nochi kita.

¹³ Matiye'nemíkanya ken se nejnemi kuá' tanesto'. Amo matitawanakan niga matiakan ilwitaj kan tawanalo, niga mati-ajapanemikan iwán amo matikchíwakan nité yej ajayekti, amo matitakuejkuesokan, niga matita-ixitakan.

¹⁴ Iga ijkón ankichíwaj, toTeko Jesucristo mitzpalewiáj iga anye'nemij, iwán amo xikejlamikikan iga ankichíwaj yej ayekti ken mitzyoltılanaj amoalmaj.

14

Amo xikpopowa mokn̄n

¹ Siga se aya momela'confiarowa ipan* Cristo, xikomemawikan iwán amo ximotenkitzkikan

* **14:1 14:1** Español: “débil en la fe”, kijtojneki iga anka némi-o' pewa iga moconfiarowaj ipan Jesucristo yej achto katka judiyojmej iwán awel kikuayaj nochi tákual iga ijkón kijtowa iley Moisés.

iwán igasan ayá' kichíwa yej amejemen ankiye'itaj.

² Sekin kijtowaj iga wel kikuaj nochi tákual, e' sekin yej aya momela'confiarowaj ipan Dios, kikuaj petz verdura.

³ Yej kikua nochi, amo makipinajti yej akikua nochi, iwán yej akikua nochi, amo makijto iga ayompa kichijto' yej kikua nochi, iga Dios ijkón kiye'ita inón toknín.

⁴ In tej, ¿te moteki iga tikijtowa iga ayompa kichijto' yej se' itekipanowani? Siga kichij yej yekti o ayekti, inonwa' kimati iteko. Iwán toTeko Dios kena kiye'itas inón toknín, iga Diossan yej wel kichíwa iga matiye'onokan iyixtaj.

⁵ Ono' sekin yej máj kiye'itaj se día[†] que se' día, iwán sekin kimatij iga nochi día kensan nochi día. Sejsé makimela'matito iga ijkonya ken kejlanto'.

⁶ Yej máj kiye'ita se día que se', inonwa' iga kiweyimatiltiá toTeko; iwán yej ayá' máj kiye'ita nisé día, no kiweyimatiltiá toTeko. Wán yej nochi kikua yej mókuapa, kuá' kikua, kiweyimatiltiá toTeko iga kimaka gracias Dios; wán yej kikuasan petz verdura, akikua naka' iga kiweyimatiltiá toTeko iwán kimaka gracias Dios.

⁷ Ayagaj de tejemej ono' iga yéjsan mamoweyimati, niga agaj mateweyimatilti kuá' timikíkeja.

⁸ Puej siga tisatokej, matonokan iga matikweyimatiltikan toTeko, iwán siga timikij, mamowey-

[†] 14:5 14:5 Judiyojmej motekisewiyaj el sábado wán kipiayaj sekin máj día iga kilwichiwiliayaj Dios, e' ayá' nochi yej kitokayaj Jesús ijkón kichíwayaj.

imatĩlti toTęko. Inón iga siga tisatokej o timik-
toskej, tejemej itatki toTęko.

⁹ Inón iga Cristo migui' iwán sej ojpa-isa', iga
mochij iTęko yej miktokej iwán yej isatokej.

¹⁰ In tej, ¿te iga tikijtowa iga ayompa kichijto'
moknĩn? ¿O te iga tikpĩnajtiá? Tonochĩn tiawij
tonotij iyixtaj Cristo kua' yéj yawi tejuzgaroti.

¹¹ Kañ ikuilijto' itájtłł Dios kijtowa ijkĩn:
Niknojma-ijtowa nokta iga inĩn mochiwas,
kijtowa toTęko, iga no-ixtaj yawij
motankuaqetzatij nochi,
iwán nochi kitenewij notoka' iga yawij kiweyi-
matĩltitij.‡

¹² Inón iga sejsé de tejemej tiawij tikijtotij iyixtaj
Dios yej tikchijkej.

Amo xikwetzĩlti moknĩn ipan iyojwi Dios

¹³ Inón iga ayo' matikijtoqan iga toknĩn
ayompa kichijto'. Majwa' xiksentalĩkan
amoalmajmej iga amo xikchiwakan nité yej
makixipolo moknĩn niga makikixti ipan iyojwi
toTęko.

¹⁴ Nej nikmati iga toTęko Jesús nenextilij iga
ateyi tákual yej ayá' nokta mokua; e' siga agaj
kejlamiki iga iley Moisés te-ijliao' iga se tákual
ayekti iga mokua, amo makikua.

¹⁵ Iwán siga yej tej tikua, iga inón tikyolmikiá
moknĩn, ayekti tikchiwa iga ompa neši ayo'
tikneki moknĩn. Cristo migui' iga inón moknĩn,
iwán amo xikchiwa iga san yej tikua, mapoliwi
moknĩn.

‡ 14:11 14:11 Is 45:23

16 Amo xikch̄iwak̄an iga mamal̄tajtolo iga in̄on yej amejemen ankiye'itaj iga ankich̄iwaj.

17 Iga in̄an Dios reinarowa§ pan tejemen, ayéj máj importante tákual niga yej mooniá, majwa' matiye'nemik̄an, matonok̄an tamelá iw̄an matipaktok̄an. In̄on kich̄iwa iyEsp̄iritoj Dios pan tejemen.

18 Yej ijk̄on kich̄iwa iga kitoka Cristo, Dios kiyé'ita iw̄an tokn̄imej n̄o.

19 In̄on iga matiktemok̄an yej kich̄iwa iga matonok̄an tamelá, iga ijk̄on wel timosepam-palewiáj iga máj matimoconfiarok̄an ipan Cristo.

20 Amo matikawaltik̄an yej Dios nemi kich̄iwa ipan se' tokn̄in, iga san yej tikuj. Nochi tákual yekti, e' siga tikua tákual w̄an se' mitzita yej kimati iga ayekti mamokua, iga in̄on tikch̄iwa, tokn̄in tikch̄iwaltia yej ayekti.

21 Yekti iga amo mamokua naka', niga mamooni vino, nité amo xikch̄iwa yej mokn̄in makich̄iwalti yej ayekti. Amo matikch̄iwak̄an nité yej makixipolo tokn̄in ipan iyojwi toTeko.

22 Ken iga timoconfiarojto', tej ijk̄on xikchijto iyixtaj Dios. ¡Mapakto in̄on taga' yej kimatito' iga yej nemi kich̄iwa ijk̄onya nokta!

23 E' siga agaj kikua tejté iw̄an ayá' kimela'mati iga yekti mamokua, yéj itechko siga kich̄iwa yej ayekti iga kikua, iga ayá' sesan iyalmaj iga kikua. Iw̄an nochi yej se kich̄iwa kuá' kimatito' iga amo makich̄iwa, in̄on ayekti nokta.

§ 14:17 14:17 Xikita glosario “Kén iga Dios reinarowa”.

15

Xikch̄iwak̄an ken kiye'ita amokn̄in

¹ Tejemej yej timoconfiarówaja ipan toTēko, matikpalewikan tokniwan yej aya momela'confiarowaj ipan toTēko. Amo matikch̄iwak̄an yejsan tejemej tiknekij.

² Sejsé de tejemej matikch̄iwilik̄an yej tokn̄in kiye'ita iga maye'ono, iwán matikpalewikan iga mamocnfiaro máj pan Dios.

³ Niga Cristo ayá' kichij yej yéj kine'; majwa' mochij ken k̄an ijkulijto' Dios itájt̄ol: “Yej mitzm̄alijlijkej, inán nej n̄o nem̄alijlijkej.”*

⁴ Puej nochi yej ikyay ijkulijto' itájt̄ol Dios, mo-ijkulioj iga matimomachtikan iwán tepalewiá iga amo matimosemakakan. Inón tájt̄ol teyolchikawa wan tenextiliá iga keman Dios temakas yej kijtoj.

⁵ Dioswa' in yej tepalewiá iga amo matimosemakakan iwán teyolchikawa, yéjwa' in yej niktajtaniliá iga mamitzpalewikan iga xikpiakan sesan amoalmaj, ijkón ken kineki Cristo Jesús,

⁶ iga amonochin xisentakuikakan iga xikweyimatiltikan Dios yej iTaj toTēko Jesucristo.

Mopowiliá ye'noticiaj yej ayéj judiyojmej

⁷ Inón iga ximosepan-omemawikan, ijkón kensan Cristo n̄o teomemawij, iga ijkón Dios makikweyimatiltikan.

⁸ Puej nimitzijliáj iga Cristo walaj iga makipalewi judiyojmej iga mamochiwa ken

* 15:3 15:3 Sal. 69:9

Dios ikya kijlij iyikyapatajwan, iga ijkón Dios kinextij iga kichíwa yej kijtoj.

⁹ Cristo wálah nō iga yej ayéj judiyojmej makiweyimatiltikan Dios iga kikheliáj, ken kijtowa kan ijkuilijto' itájtōl Dios:

Inón iga nia nikpowati motájtōl ipan paismej, iwán nimitztakuikilij iga nimitzweyimatiltij.†

¹⁰ Ono' se' kan ijkuilijto', kijtowa:

Xisempakikan amejemen yej ayéj anjudiyojmej, xipakikan iwán inomej yej itatki Dios.‡

¹¹ Ono' se' kan ijkuilijto', kijtowa:

Nochi paismej, xiktakuikilikan toTēko,

iwán nochi xikweyimatiltikan Dios.§

¹² Isaías nō kijkuiloj:

Kisas ipan ipilowan ipilówampa Isaí,*

se yej yawi kigobernarōti yej ayéj judiyojmej;

yej ayéj judiyojmej moconfiaroskej ipansan yéj.†

¹³ Niktajtaniliá Dios yej tepalewiá iga wel timoconfiarowaj ipan yéj iga nochi ye'kisas, mamitzyolchikawakan iwán makichíwa iga xonokan tamelá iga pan yéj ankisentalijkej amoalmaj. Inón iga wel máj anmoconfiarowaj ipan yéj iga nochi ye'kisas iga mitzpalēwiáj iyEspíritoj Dios.

¹⁴ Nokniwan nej nikmati iga amejemen poxsan ante-ijikniwej iwán ankimátija itájtōl Dios iwán welya anmosepannōtzaj.

† 15:9 15:9 Sal 18:49 ‡ 15:10 15:10 Dt 32:43 § 15:11 15:11

Sal 117:1 * 15:12 15:12 Cristo de la familia de David yej ipiltzjn Jesé yej nō itōkqá' Isaí. Mt 1:6, 1 Sam 16:10-13 † 15:12 15:12 Is 11:1,10

15 E' ipan inín ama' nimixewij sej iga nimitziykuilowilijkej inimej tajtolmej iga amo xikelkawakan. Inín nikchiwa iga Dios ne-iknelij iwán nemá' inín tekipánol

16 iga nej itekipanowani Jesucristo. Nikuiguiliá itájtol Dios yej ayéj judiyojmej iga inón notekipánol. Ijkón yej ayéj judiyojmej Dios makikui iga ofrenda yej makiye'ita. El Espíritu Santo mitztapejpenkej iga xonokan ken ofrenda iga Dios.

17 Iga nej Cristo Jesús netapejpen iwán niyolpaki iga nikchiwa itekipánol Dios.

18 Yej nikijtowa, petz yej Cristo kichij iga nepalewiy iga manikchiwa, iwán manikpowa itájtol iga ijkón yej ayéj judiyojmej makichiwakan ken kineki Dios. Yej ayéj judiyojmej kicredojkej yej nikijtoj wan yej nikchij.

19 Yejemen kicredojkej iga kitakej milagro wan yej ayi'pa mo-ita yej mochij iga ipoder iyEspíritoj Dios. Noyan nikpowa'ya itájtol Cristo yej tamanawia, nipewa' Jerusalén iwán niajka este ipan ital Ilirico.

20 Ijkón nochipa nikne' manikpowa itájtol Dios yej tamanawia kan aya i' kikakij itoka' Cristo, iga amo manitekivano kan se'ya kipewaltij tekipánol.

21 Majwa', mochij ken kijtowa kan ijkuilijto' Dios itájtol:

Yawij kitatij inomej yej ayi' kimatikej de yéj, iwán kentenderoskej yej ayi' kikakikej de yéj.‡

‡ 15:21 15:21 Is 52:15

Pablo yajneki Roma

22 Inón iga nokta ayá' nemi nia nimitz-paxalowilitij, malej iga mia' vej niajnekiá.

23 E' inán iga niktámija notekipánol nigaj kan ninemi, ay' te netzakuiiá, iwán íkyaya nikneкто' iga manono amowan.

24 Kuá' niaj España, niaj nimitz-paxalowilitij. Nikneki iga ompa manipano iga matisenyolpakikan, malej iga nimaninsan, iwán kuá' ni-ójkuisya, nikijtowa iga achi xinepalewikan.

25 Inán nia Jerusalén, nikuiga tomín iga tokniwan yej amotapialiáj yej ompa onokej.

26 Iga yej chantitokej estado de Macedonia iwán Acaya kejlankej iga kinechkojkej achi tomín iga kititaniliáj tokniwan yej amotapialiáj yej onokej Jerusalén.

27 Kiyé'itakej iga kichiwaj inín, iwán yejemej nokta kimatantokej in judiyojmej; iga judiyojmej yej kicredowaj Jesús kimakokatijkej no itájtol Dios yej ayéj judiyojmej, inán yejemej no makipalewikan iga tomín judiyojmej.

28 Inón iga, kuá' tamis nikchivas inín, iwán nikmakáskeja tomín, niajya España, e' ompa nipanoj iga nimitz-paxalowiliskej.

29 Nikmati iga kuá' niaj ompiga Roma, ayo' tepoloskej nité iga Cristo tesenyolchikawas.

30 Nokniwan, iga timoconfiarowaj ipan toTeko Jesucristo, iwán iga iyEspíritoj Dios kichywa iga matimochokilikan, nimitztajtaniliáj iga achi xinepalewikan iga xiktajtanilikan Dios iga nej.

³¹ Xiktajtaniłikan Dios iga manemanawi ipan inomej yej akicredowaj Dios yej onokej Judea. Xiktajtaniłikan no iga inin tomin yej nikuiguiliá tokniwan yej onokej Jerusalén wel manewelkujlikan.

³² Iwan siga Dios ijkón kineki, nia nipakti-asiti wan amejemen iga nimitzitaskej, iwan ompay timoyolchikawaskej.

³³ Dios yej kichiwa iga matonokan tamelá, maono wan amejemen. Ijkónyawa'.

16

Pablo tanonotza

¹ Nimitzmatiltiáj iga xikye'itakan la hermana Febe. Yéj kitalkej* iga makipalewi yej kicredowaj Dios yej chantitokej altepe' Cencrea.

² Xikye'omemawikan ken kajasi iga mamochiwili yej tiksentokaj toDios, iwan xikpalewikan siga tejté kipolowa, iga yéj mia'ya kipalewij, iwan nej no nepalewij.

³ Xikijlikan la hermana Priscila wan el hermano Aquila† iga nikelamikij; iwamej nisen-tekipojkej iga nikpojkej itájtól Cristo Jesús.

⁴ Yejemej ayá' majmawikej iga mamikikan kuá' nemanawikej. Inón iga nikmakaj gracias, ayejsan nej, nochi tokniwan kajkan monechkolo yej ayéj judiyojmej, yej kitokaj Dios.

⁵ Ijkonsan no xikijlikan tokniwan yej mon-echkowaj chan Priscila iwan Aquila iga nikelamikij. No xikijlikan noamigoj Epeneto iga

* **16:1 16:1** Español: diaconisa, xikita glosario "Diácono wan diaconisa". † **16:3 16:3** Hch 18:2

nikejlamiki, yéj achto yej kicređoj Cristo ipan estado de Acaya.

⁶ Xikijlikan nō María iga nikejlamiki iga yéj poxsan tekipanoj iga amejemen.

⁷ Xikijlikan nō nikejlamiki Andrónico iwán Junias, yejemen nō judiyojmej kensan nej, iwamej nonoyaj carcelijti'. Poxsan kiyey'itakej apostolejmej, iwán yejemej máj achto kicređojkej Cristo que nej.

⁸ Xikijlikan nō nikejlamiki Amplias, yéj noamigoj yej nō kitoka toTeko.

⁹ Xikijlikan nō nikejlamiki Urbano, yej iwán nisentekipanojkej iga nikpojkej itájtōl Cristo Jesús, iwán Estaquis yej nikpoxchokiliá.

¹⁰ Xikijlikan nō nikejlamiki Apeles, yej monéxtija iga kisentálijto'ya iyalmaj pan Cristo. Iwán xikijlikan nō nikejlamiki tokniwan yej onokej íchan Aristóbulo.

¹¹ Xikijlikan nō nikejlamiki Herodión yej nō judío kensan nej, iwán yej onokej íchan Narciso, yej kitokaj toTeko.

¹² Xikijlikan nō nikejlamiki Trifena iwán Trifosa, yej tekipanowaj iga kipowaj itájtōl toTeko, iwán la hermana Pérsida, yej poxsan tekipanoj ipan iyojwi toTeko.

¹³ Xikijlikan nō nikejlamiki Rufo yej toTeko kitapejpen iwán xikijlikan nō nikejlamiki iye', iye' Rufo ken tikita noyey' nō.

¹⁴ Xikijlikan nō nikejlamiki Asíncrito, Flegonte, Hermas, Patrobas, Hermes iwán tokniwan yej onokej iwamej.

¹⁵ Xikijlikan nō nikejlamiki Filólogo iwán Ju-

lia, Nereo wān isiwa-ikn̄n, iwān Olimpās iwān nochi tokn̄wān yej kitokaj toTēko yej onokej iwamej.

16 Ximopipitzokān iga ximosaludarokān ken Dios kiyē'ita. Nochi tokn̄wān yej kitokaj Cristo, nō mitzejlamikij.

17 Nokn̄wān, nimitztajtaniliáj iga amo xikwelkuilīkān itajtōlmej yej tayojoyokatiáj iwān tapojpolowaj, iga tamachtiáj ayéj ijkón ken mitzmachtijkej. Amo ximotokakān iwamej,

18 iga inomej ayá' kich̄iwaj ken kineki toTēko Jesucristo, majwa' kich̄iwaj ken kinekij yejemej, iwān kiyolyamanaj tokn̄wān yej aya kojasiy iyojwi Dios, iga tajtōlmej yej te tzojtzopéli'san este teyē'asi, e' takajkayawaj.

19 Nochi kimati iga ankichijkej ken mitzteki-makakej. Inón iga nipaki iwān nikneki iga xikye'tapejpenakān iga ankich̄iwaj yej yēkti, e' xikajtewakān yej ayēkti.

20 Iwān Dios yej kich̄iwa iga matonokān tamelá ay' kē' poliwi, yawi kitānilīti Tzitzimi' iwān kitālīj amokxitan. ToTēko Jesucristo mamitzyōlchikawakān.

21 Mitzejlamikij nō Timoteo yej iwān nisen-tekipanowa, iwān nō Lucio, Jasón wān Sosípater, yej judiyojmej nō kensan nej.

22 Nej notokā' Tercio, yej nemi nikijkuilowa itajtōlmej Pablo pan in̄n ama', nō nimitzejlamikij ipan itokā' toTēko.

23 Mitzejlamikij nō Gayo. Nej Pablo nono' íchān Gayo, iwān nij íchān motekinechkowaj

nochi toknīwan yej nij kitokaj Cristo. No mitze-
jlamikij Erasto yej kena tomīn iga tekiwajmej de
inīn altepe', iwān mitzejlamikij no toknīn Cuarto.

²⁴ ToTeko Jesucristo mamitzyolchikawakan
amonochin. Ijkónyawa'.

Pablo kiweyimati toDios

²⁵ Inān matikweyimatiltikan Dios yej kichīwa
iga māj ximoconfiarokan ipan yéj. Dios mitz-
palewiáj iga ankicredoijkej kuá' nimitzpowilijkej
itájtōl Jesucristo yej tamanawiá. Inīn ijkōnsan
ken Dios kinextij yej kichīwasnekiá yej aya
momatiá, inōn iyantoya este pox ikyay este iga
aya ono' inīn tajli,

²⁶ e' inān momátiya. Dios yej nochipa ono',
tatekimá' iga profetajmej makijkuilokan itájtōl
Dios iga mamomátiya ipan nochi paismej iga ma-
kicredoķan iwān makichīwakān ken yéj kineki.

²⁷ ¡Dios ateyi se' ken yéj, iwān yéj nochi kimati
te kichīwa; mamoweyimatilti nochipa iga yej
kichīwa Jesucristo! Ijkónyawa'.

Isthmus-Mecayapan Nahuatl
Nahuatl, Isthmus-Mecayapan: Itájtōl toTēko ipan
mela'tájtōl New Testament

copyright © 2016 Wycliffe Bible Translators, Inc.

Language: Nahuatl, Isthmus-Mecayapan

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source
files dated 17 May 2025

8d5b6a33-8846-5c0f-ae8f-62c94f894f7b